



Paran da sa divertir durant il gir tras la Higa: Christian Rathgeb, cusseglier guvernativ, Vitus Dermont, president dal cussegl grond e Marco Engel, schef da l'exposiziun (da san.)

FOTOS G. N. STGIER

«Nossa Higa – Nossa exposiziun»

La Higa ha avri las sias portas

DA GION NUTEGN STGIER / ANR

■ **Dapi 60 onns tutga l'exposiziun tar Cuira, quasi sco il Calanda, la pli enconuschenta muntogna sur la chapitala grischuna. Er suenter sis decennis mancan betg ils tschitschapulvra e las padelas tar l'exposiziun da giubileum. En preschientscha da blera prominenz politica e da l'economia ha la 60avla Higa avri sias portas.** En il decurs dals davos 60 onns è la Higa daventada ina «marca» da Cuira e tar ina exposiziun da primavaira che ha sa fatg in num er sur ils cunfins grischuns. L'occurrenza è anc adina populara e cunzunt tar l'avertura vala il motto: vesair ed esser vesì. Gist uschia èsi er stà sonda passada cura che la Higa 2016 ha avri sias portas per otg dis. Fatg onur a la giubilara han per exempel er *Vitus Dermont*, president dal cussegl grond, *Christian Rathgeb*, cusseglier guvernativ e president da la regenza sco era *Tina Gartmann*, presidenta dal cussegl communal da Cuira.

Gia tar l'emprima Higa 15000 visitaders

Dapi il 1999 è *Marco Engel* il schef da la

Higa. El ha beneventà mintga giast personalmain il di da l'avertura da l'exposiziun da giubileum. En pled e maletg ha el dà in sguard en l'istorgia da la Higa, l'occurrenza che ha adina lieu l'emna d'Ascensiu. Il 1957, l'on che l'occurrenza d'industria e commers haja gi lieu per l'emprima giada, haja quella attratg 15000 visitaders, ha ditg Engel. Da lez temp hajan 74 expositurs nizzegià l'occurrenza da preschentar lur products a la publicità en la halla da fiera a Cuira. Ils davos onns sajan quai adina radund 200 expositurs, ha menziunà il schef da la Higa.

«Calanda» e «Cottinelli»

Dus expositurs sajan dapi il 1957 adina stads da la partida e quai sajan la bieraria «Calanda», oz «Heineken» e la firma da vin «Cottinelli». Avant 30 onns haja la Higa gi cun var 94000 visitaders fin oz il pli grond interess e dapi il 1992 saja il dumber dals visitaders sa reduci sin ina media per di da 7000 visitaders. Oz saja la Higa plitost ina exposiziun da cussegl e d'examinar e na ina exposiziun da vendita, ha ditg Engel. Sa laschar cussegljar e lura cumprà il product «online», quai

saja oz er tar ils visitaders da la Higa la via da vegnir tar il product. En ses pled d'avertura ha il schef da la Higa er menziunà il curaschi dals quatter iniziants da l'exposiziun, ils interprediders Leonhard Dosch, Josef John, Ernst Klötzli ed Arthur Schmid.

Ina buna plattforma per il commerzi

In dals gratulants è er stà cusseglier guvernativ Christian Rathgeb. El ha ditg che en quels 60 onns da la Higa sajan dus aspects da gronda muntada. Quai sajan ina giada l'organisaziun e lura la perseveranza e la professionalità. Ils organisaturs hajan bain gronds marets, dentant bunamain pli impurtants sajan ils expositurs, els che sajan dapi decennis propi fidaivels. Rathgeb ha engrazià als organisaturs da porscher dapi 60 onns, al commerzi cun la Higa, ina buna plattforma da sa preschentar ad in vast public. L'exposiziun haja però er in aspect social, segna la Higa per s'entupar, vasair, discurre e sa divertir en cuminanza, ha ditg il president da la regenza. Concludì ses pled ha el cun dir: «Nossa Higa – Nossa exposiziun!»



Marcus Menzli (a san.) da Menzli Sport en discussiun cun trais enconuschents.



Economia e politica unida tar la Higa. Piotr Caviezel, manader da marketing da la Viafiera retica e Tina Gartmann, presidenta dal cussegl communal da Cuira.



E qua avain nus (da san.) Tom Leibundgut, il cusseglier da la citad da Cuira cun Martin Vincenz, il nov directur da Grischun Vacanzas.



Cun Rolf Hanimann (a san.), veterinari chantunal, e Thomas Roffler, president dals purs grischuns, era er represchentada l'agricultura il di da l'avertura da la Higa.



Da la partida a l'avertura er Flurin Caviezel, il cabarettist, cun sia dunna Doris Caviezel-Hidber.



Stà a l'avertura da la Higa è er Robert Brunold, il president da l'Uniu chantunala dals chatschaders.

FOTOS G. N. STGIER